

HAUTE - DEULÉ.

1271. — OCTOBRE. — JEAN, CHATELAIN, ET LES ÉCHEVINS DE LILLE.

(F° 270).

*Traité entre le châtelain et la ville de Lille pour l'établissement d'un canal depuis La Bassée jusqu'à Lille.*

Collationné sur l'original ; Arch. de Lille, titres anciens, carton A. 20.

Jou, Jehans, castelain de Lille, chevaliers, et nous li eskevin, li wît hommes, li jure et toute li communites de le ville de Lille, faisons asavoir a tous chiaus qui ces lettres verront et oront que tele est li convenence entre nous Jehan, castelain de Lille, d'une part, eskevins, wit homes, jure, et le communite de le vile de Lille d'autre part : que jou Jehans, castelains devant dis, doi faire faire un fosse movant de le Bassee qui viengne tresci a Habourdin a men frait et a men coust, tel que li fosses doit avoir quarante pies de deuwe a autre et quatre pies deuwe au mains en este au plus sec tans, et sis pies de voie alun les u a lautre, pour traire les nes. Et si doi faire ausi un fosse tout en autel point et de largecce et de parfondecce et autel voie que devant est dit, movant de Habourdin, qui viegne tresci au liu la u on doit faire portes et de l'ariant portes desous tresci en le Deule derriere le Folie. Et tout ce fosse movant de le Bassee et venant tresci en le Deule, si que dit est, doi jou, Jehans, castelains devant dis, faire faire et faire fuir et faire voie de sis pies a lun les u a lautre et terre livrer a men frait et a men coust, arres de le tiere dou Ries qui est a le ville, cele tiere ne doi jou mie acater, mais le fosse tout ensi que deseure est dit idoi jou faire. Et si doi le riviere devant dite frankir de winage, de tous paiages et de toutes autres prises a tous jours, et de cou frankir doi jou donner as eskevins et au conseil de le vile de Lille lettres me dame le contesse et les moies lettres et lettres de tous segneurs qui droit idemandent. Et si doi faire pais a tous ceux qui moulins ont moulans de cele riviere, si avant que li riviere portera, que on n'en demandera nient a le ville de Lille, et si doi oster mes moulins de Habourdin tous nes. Et si doi faire un fosse tel qui puist porter navie dou bos dou Ploic movant qui veigne trescie en cele riviere. Et est asavoir que jou doi tout avant faire faire le fosse bien et souffisaument si que dit est a men frait et a men coust de le Bassee tresci a Habourbin, ançois que li vile me paice nul denier. Et pour toutes ces choses faire bien et souffisaument, si que deseure est devise, Nous li eskevin, li wît home, li jure et toute li communites de le vile de Lille, devons doner au castelain devant dit quinse cens livres dartois de le monoie de Flandre, par si quil face les choses si que devant sunt dites. Et pour cou que toutes ces choses soient fermes et bien tennes et de lune partie et de lautre, avons nous ces presentes lettres saelees de nos seaus. Ce fu fait lan del incarnation notre Segneur mil CC et sissante et onse le dioels devant le jour tout Sains.